

# **Yesu kixinging tela Yems bung xailong tela mala rangua Yuda hatuminga haringinamdi. Tauxu xailongga li ba, Yems**

## *Namua Yems Bung Mala Na Yudadi*

Yems bung mala rangua Yuda hatuminga haringinamdi duwa mana numanuma xangxana. Bo ba dili haringina hatumingading haringinia. Hatanga ba hatuminga haringing maxunam bing kubolu xai. Hatanga ba hatuminga haringing maxunam bing xabianga titiam te. Yems bung xailongina bila niani AD 50 kimbo niani AD 60.

## *Lipu Buningama*

Lipu buningama bing Yesu kixinginoa (Matyu 13:55), yanoa Yems, xaung Yerusalem Kaunsilidi yanamiding tela (Aposel 15). Yesu owa masok mana kimuya mana mesa muli (1 Korin 15:7). Pol uxu ba sabunga “tuxang” tela (Galesia 2:9). Pol ila bagu Yems bunging luwa (Galesia 1:19 xaung Aposel 21:18). Dung Yems mati bila niani AD 62, namua na Yesu lipuxing tela.

## *Haruanga Tuandi*

- Haruanga mugamugangam (1:1)
- Tubaikdi xaung mauxangandi (1:2-18)
- Lungu saing libu (1:19-27)

- Libu kubolu taininau na lipu longgalo (2:1-13)
- Hatuminga haringina xaung kubolundi (2:14-26)
- Tawasa xai mana suxunguradi (3:1-12)
- Hatuminga maxang luwa (3:13-18)
- Tawa hawa mana Urana (*Hataina* 4)
- Haruanga ila rangua lipu xalaxalamdi (5:1-6)
- Haruanga mauxanganamdi xaung haruanga haringiangamdi (5:7-20)

### *Haruanga Mugamugangam*

<sup>1</sup> Nga Yems, lipu oxatam mana Urana xaung Toxoratamona Yesu Kristo.

Ngabung xailongga li nang, ang 12 bakbakkadi\* ayunga yabaima awa mauli mana titi teladi.

Xaidap xai.

### *Tubaikdi Xaung Mauxangandi*

<sup>2</sup> Riagu hatuminga haringinam mana, bungina mauxangang xangxana daxap kang, bing gamoimdi diyaha sibuna, <sup>3</sup> namua na ang gaxabia ba bungina dituba hatumingaim haringindi, bing daharingia lilingaimdi. <sup>4</sup> Binabu ayunga lilingaimdi ditubu to, namua na bungina lilingaimdi disahi oxatadingdi, bing dilibu ang gaharing xaung kuboluim maringindi ditubu masup, araxap mana axamang tela te. <sup>5</sup> Ne nabu angia

---

\* **1:1** 12 bakbakkadi mogu Kristo lipuxing hatuminga haringinamdi, daxap salaga saing dahatibaxaya mala numanuma xumana. Yems harua bila li namua na Yudadi disok mana Yekop garang 12, saing waleu sibuna dila numanuma xumana bungina lipu long telamdi didalidi saing daxapdi mala.

teladi diraxap mana xabianga maringina mana dili haringina baru, bing duxusunga Urana saing bagula sina nadi. Ina lipu sinaikkam, sina hatuminga maringina na lipu gaxarea duxusunga mana, sanga ba gamiadi te. <sup>6</sup> Ne bungina uxusunga, bing uhatum haringina saing hatumingam luwau tai, namua na lipu gaxarea hatumingading luwa bila ruba tela, yanga yubua saing ting mauli. <sup>7</sup> Lipua na bila ba sanga ba hatum ba bagula xap axamang tela rangua Toxoratamona te. <sup>8</sup> Ina lipu hatuminga luwam, axamang longgalo libudi bing dilulu.

<sup>9</sup> Riara hatuminga haringinamdi gaxarea haxugiding bing diyaha, namua na Urana maxania daxap yaya sabanga. <sup>10</sup> Lipu xalaxalamdi bing diyaha bungina Urana tatuadi, namua na lipu xalaxalamdi bagula disup bila haidanga abunging oxana. <sup>11</sup> Bungina xaidaba haing, sala haringina saing libu haidanga mutuxu, oxanoa ri saing gumanginoa sup. Bila balau, lipu xalaxalamdi bagula dimati liwe mana oxatadingdi.

<sup>12</sup> Lipudi dili haringina bungina mauxangandi daxapdi, bing gamodingdi diyaha, namua na bungina tubaikka sup, didali, baing bagula daxap walinga subingang teguam mana haxuyangadingdi, bila Urana hau haruangua ba sina na lipuadi muruding sibuna mana.

<sup>13</sup> Bungina tubaiga xap lipu tela, bing labu harua ba Urana xai ba libu doau tai. Namua na axamang dian tela sanga ba xai Urana bu libu doa te. Baing ina xai lipudi bu dilibu doa te. Tegu. <sup>14</sup> Lipu taining tainina, murungading diandi daxaidi, dilanguadi bu dilibu doa, bila

bitinga tuxu asaxua. <sup>15</sup> Baing bungina murunga diana aningona, hayau kubolu dianoa masok. Kubolu diana ila tubu, baing hayau matiyua masok.

<sup>16</sup> Riagu hatuminga haringinam mana, amaxania nam lipudi dilanguang. <sup>17</sup> Yahanga xai xaung yahanga maringing sibung longgalo diri eta lo ma, diri ma rangua Tibura tongtongia luliang etaloamdi. Xugia bila yongga kikisingangam te. <sup>18</sup> Ing murunganoa, baing mana haruangang maxunama libu kira tasok garandi. Libu bila ba bu kira tawa mugamuga mana axamang longgalo tongtongiadi.

### *Lungu Saing Libu*

<sup>19</sup> Riagu hatuminga haringinam mana, alungu to. Ang taining tainina bing ata tangaimliandi sap bu alungu haruangua, ahatum xai to tauna aharia, saing atim disala sapku tai, <sup>20</sup> namua na kubolu maringina Urana muruna mana ba, lipua atin disala sanga ba xap masok te. <sup>21</sup> Binabu asauya kubolu musunam longgalo xaung kubolu diang longgalo. Baing atatuang saing atuxu haruanga Urana xuma hatumingaimia. Haruanga ba sanga mana xapkang muli.

<sup>22</sup> Bing alungu haruanga ba saing alibu kubolunoa xauna. Nabu alungu ing ganina, bing bila alanguang. <sup>23</sup> Nabu lipu tela lungu haruangua, ne su mana te, bing bila bagu ramramonoa babwia. <sup>24</sup> Kimuyu mana bagu babunoa, ila halingalinga sap ramramonoa muli. <sup>25</sup> Ne lipu gaxarea dibagu xai maluxu mana Urana hanaunaunganoa, haruanga baguba maringing

sibuna saing xap lipudi muli sangua kubolu diang haringinganoa—lipuadi dilibulibu bila ba, dilungu saing dahalingalinga te, bing Urana bagula guxam oxatadingdi.

<sup>26</sup> Lipu teladi dahatum ba disu maringina mana Urana, ne duwasa xai mana suxungudingdi te. Lipuadi na bila ba dilangua ding saing axadi dilibudi ba disu mana Urana, axamang olandgi. <sup>27</sup> Nabu abo ba asu mana Urana Tibura bu awa maringina xaung musuim te maxania, bing alibu bila li: Awasa mana hagudi xaung tapdi maluxu'm mauxangadingdi, saing awasa xai mang, nam kubolu titiama libuang musuim.

## 2

### *Libu Kubolu Taininau Na Lipu Longgalo*

<sup>1</sup> Riagu hatuminga haringinam mana, mana namua ahatum haringina mana Toxoratamona kiria Yesu Kristo, ina lipu ralanam, bing kubolua alibu hasusu mana lipu longgalo te, bing asauya.

<sup>2</sup> Ahatum to. Lipu tela ma sabungaimia, sau imang gumangina xaung raxu gol tela. Saing lipu haxuging tela sau imang musuna singina ma xauna. <sup>3</sup> Baing alibu xai mana lipua sau imang gumangina saing aharua na ba, “Uma urung kabukabu xaiya li.” Ne abala lipu haxugina ba, “Uli la ba, kimbo urung mari titia.” <sup>4</sup> Nabu alibu bila ba, bing ahata lipudi mana gugunianga luwa liwe mang, saing alibu kubolu diana, asuxuya lipudi doa.

<sup>5</sup> Riagu hatuminga haringinam mana, alungu to. Lipuadi duwa haxugina mana lipu titiamdi

maxadingia, Urana mogudi ba hatumingading haringindi ditubu xaung bagula diluxu Yonggaxinia, bila hau haruangua mana lipuadi muruding sibuna mana. <sup>6</sup> Ne ang ba, ang gasina memeyua na haxugindi. Ahatum to. Gaxarea ditatuang saing disina mauxangandi nang? Gaxarea daxaiang mala haruangua? Haxugindi? Tegu. Lipu xalaxalamdi. <sup>7</sup> Ding naga didaudau Kristo yang xai sibunoa sina nang ba.

<sup>8</sup> Xaitamoxiroa hanaunau mana Xuanoa ba, “Ung murum sibuna mana lipu longgalo bila ung murum sibuna maung.”✧ Nabu asu maringina mana hanaunaungana ba, bing alibu xai. <sup>9</sup> Ne nabu alibu hasusu mana lipu longgalo te, bing alibu kubolu diana, saing hanaunaungua hatanga ba ang lipu hanaunaunga dalinganamdi. <sup>10</sup> Namua na lipu gaxarea disu mana Urana hanaunaungang longgalo ne xungdi mari mana taininau ing ganina, bing ding didali hanaunaunga longgalo saing musuding Urana maxania. <sup>11</sup> Namua na Urana taininau harua ba, “Labu uhaxa mauli rangua yaungamdiu tai,”✧ xaung harua ba, “Labu ung lipua matiu tai.”✧ Namua naga nabu uhaxa mauli rangua yaungamdi te ning ung lipua mati, bing usok lipu hanaunaunga dalinganam.

<sup>12</sup> Binabu baraxinta aharua saing baraxinta alibu, ahatum to: Urana bagula tang haruangua mana hanaunaunganoa xap kira muli sangua

---

✧ **2:8** Lipu Hananiangam Oxatanoa (Wok Pris) 19:18 ✧ **2:11**  
 Xapdi Muli (Kisim Bek) 20:14; Hanaunaunga (Lo) 5:18 ✧ **2:11**  
 Xapdi Muli (Kisim Bek) 20:13; Hanaunaunga (Lo) 5:17

kubolu diang haringinganoa. <sup>13</sup> Namua na lipu gaxarea dilibu kubolu usingangam te, Urana bagula usingadi te bungina tadi haruanga. Ne nabu ung lipu usingangam, bing kubolua Urana usingaung mana bagula dali kubolua suxuyaung mana.

### *Hatuminga Haringina Xaung Oxatandi*

<sup>14</sup> Riagu hatuminga haringinam mana, nabu lipu tela baxanga ba hatumingang haringina ning oxatan te, alaba xai? Tegu. Sanga ba hatumingang haringina bila ba xap muli? Tegu sibuna! <sup>15</sup> Nabu riaim hatuminga haringinam tela xola mana imang xaung anginga. <sup>16</sup> Baing angia tela harua na ba, “Ula, uwa xai. Oxong xai, saing gaurim te,” ning hauli sangganoa te, alaba xai? Tegu. <sup>17</sup> Bila balau, hatuminga haringina wa olang, nabu wa xaung oxatan te, bing mati.

<sup>18</sup> Nabu lipu tela harua ba, “Ung ba hatumingam haringina, ne nga ba oxatagudi. Kira maxang taininau.” Haxuyangagua bing, “Nabu ngabagu oxatamdi te bing sanga ba ngabagu hatumingam haringina te. Ne bagula ngahatanga naung hatumingagua haringina mana oxatagudi.” <sup>19</sup> Uhatum to. Uhatum haringina ba Urana taininau ing ganina wa. Alaba hatuminga xai. Ning sanga lo? Xaungadi xauna dahatum haringina bila ba, ne dimaxuwa saing dilulu.

<sup>20</sup> Ung lipu kakahana, ubo ba ngahatanga naung ba hatuminga haringina xola mana oxatadi bing axamang olang? <sup>21</sup> Tauna, uhatumia

Ebrahim, mugangaroa.\* Xauxau ba hanania garanoa Aisak mana kabukabu hananiangam. Baing ina naga, Urana bagu oxatanoa, saing uxu ba lipu maringina. Maxuna? <sup>22</sup> Maxung sibuna. Ubagu hatumingang haringina xaung oxatana tang duwaxata xauna, saing oxatana libu hatumingang haringina aningona. <sup>23</sup> Baing Urana Xuanoa aningona, harua ba, “Mana namua Ebrahim hatum haringina mana Urana haruanganoa, bing uxu ba lipu maringina.”<sup>☆</sup> Baing duxu ba, “Urana rianoa.” <sup>24</sup> Ubagu baing, Urana uxu kira ba lipu maringindi bungina oxataradi duwa xaung hatumingara haringina. Uxu kira ba lipu maringindi mana hatumingara haringina ing ganina te.

<sup>25</sup> Bila balau mana Rehap,<sup>†</sup> haing daxangama. Sok maringina Urana maxania mana oxatanoa. Namua na wasa mana Isreldi lipu bagubagungamdi, saing tadi daxanga tela bu digoxoya mala xai. <sup>26</sup> Baing ina naga, hatuminga haringina xola mana oxatanoa mati, bila sangga xola mana aningonoa mati.

### 3

#### *Tawasa Xai Mana Suxunguradi*

---

\* **2:21** Yuda longgalo disok mana Ebrahim binabu mugangading mugamugangama. Yems xaung Kristo lipuxing xumana Yems bung mala ranguadi, ding Ebrahim garandi. Yuda Tegumamdi dimogu Ebrahim bila mugangadinga namua na muga mana duxu sangganoa wa bila Yuda Tegum tela saing hatum haringina mana Urana, Urana hau haruangua rangua teguyu.

☆ **2:23** Unggutinga (Stat) 15:6 † **2:25** Ubagu Yosua (Josua) 2.



<sup>1</sup> Riagu hatuminga haringinam mana, labu ang xumana asok lipu tubatubaingamgu tai. Namua na ang gaxabia ba Urana bagula suxuyam lipu tubatubaingamdi haringina mana lipu teladi. <sup>2</sup> Kira longgalo talibu doa mana axamang xangxana. Ne lipu gaxarea dilibu doa mana haruangadinga te, ding lipu maringing sibundi, ding sanga mana duwasa xai sibuna mana kuboluding longgalo.

<sup>3</sup> Kira tata ain hataing kaxukana maluxu mana hosidi suxungudingdi bu disu mana kira murungaroa. Binabu sanga ba taxugia asaxa sanggang longgalo. <sup>4</sup> Kimbo ahatumia wagadi. Ding sabanga sibundi saing yang haringina yudi mala, ning axamang kaxukang sibuna xugiadi, dila mana long baruamta lipu xugiangama muruna mana. <sup>5</sup> Bila balau, suxunguxungua bing sangga hataing kaxukana. Ning itina haringina. Ahatumia: Yap nanggixang kaxukana sanga ba tau timung sabanga. <sup>6</sup> Baing suxunguxungua xauna bila yap tela. Baxagi mana diang xangxana, libu sangga musuna masuk mana kubolung diandi. Sanga ba xugia walingaroa sok bila yap sabanga hanggalangiam, namua na yabinoa ma taxa long salakkamia.

<sup>7</sup> Lipudi daxap asaxa abunging xangxana bila asaxa, mang, moxa, asaxa tekkam, saing duxumbudi, waleu sibuna ma hatata. <sup>8</sup> Ne lipu tela sanga ba xumbu suxungunoa te. Axamang xukxugiangam diana, baxagi mana baxi diang ungingam.

<sup>9</sup> Mana suxunguradi bunging teladi taiti Tox-oratamona Tibura yanoa, saing bunging teladi

tahanggalangia lipuadi Urana tongtongiadi bila ina. <sup>10</sup> Mana suxunguxungu taininau sok itinga xaung haruanga hanggalangiangam. Riagu hatuminga haringinam mana, alali sanga te! <sup>11</sup> Sanga ba langa xaung tek\* tang bokboga masok mana banggum langing taininau? Tegu sibuna! <sup>12</sup> Riagu hatuminga haringinam mana, sanga mana wawai ua unggakdi, kimbo sanga mana axaiba ua wawaidi? Tegu. Bila balau sanga ba axu langa tegia te.

### *Hatuminga Maxang Luwa*

<sup>13</sup> Lipu gaxarea liwe mang hatumingading daxai xaung xabiangading dimaring? Bing bung-  
ingbunginalo dilibu kubolu xaidi bu dahatanga na lipudi ba oxatading xai disok mana xabian-  
gading maringina xaung kuboluding xaringana. <sup>14</sup> Ne nabu hatumingamia ubo ba utatua lipudi, ubo ba uwa mugamuga manadi, ubo ba uharua kimu manadi, nabu hatumingama doa bila ba, bing labu uitiung ba ung lipu hatuminga xaiyamgu tai, namua na bungina ulibu bila ba, uharua ba Urana haruanganoa maxun te. <sup>15</sup> Xabianga na bila li ri ma rangua Urana te. Tegu. Xabianga ba xabianga titiam, aningonigo teguam, ma rangua xaungadi. <sup>16</sup> Namua na long baruamta kubolu haruanga kimuam xaung kubolu tatuangam duwa, la ba bagula abagu kubolu utuutungam xaung kubolu diang long-galo. <sup>17</sup> Ning xabianga maringinoa ma rangua Urana bing muga sigixingang sibuna. Xauna, libu lipudi

---

\* **3:11** Grik xuana—lang mabiana.

muruding mana kubolu gamogamu taininau, dirung mosi rangua lipudi, duwa hawa mana lipudi, dibaxagi mana kubolu usingangam xaung aningodingdi disok xai, dilibu hasusu mana lipu longgalo, xaung disu mana ding haruangadinga. <sup>18</sup> Lipu aningoxamdi ding bila duxuma anginga xuyang tela umangadingia, ua saing aningona bila kubolu maringing xangxana.

## 4

### *Tawa Hawa Mana Urana*

<sup>1</sup> Baraxinta libu agamiang, ahakhaxi liwe mang? Sok mana sangga murungandi dahaung mua maluxu mang, maxuna? <sup>2</sup> Ang murungaim mana axamang tela, ning axap te. Binabu aung. Axawa, ning sanga ba axap te. Binabu ahakhaxi, agamia. Axap axa abo mana te, namua na axusunga Urana te. <sup>3</sup> Bungina axusunga, bing axap te, namua na axusunga hatuminga titiamia, bu asahi sangga murunganoa.

<sup>4</sup> Ang bila lipudi dahaxa mauli rangua yaungamdi! Lipu gaxarea riading riading rangua titia li bing hauxading sibuna mana Urana. Axabia alaba te? Lipu gaxarea muruding mana axamang titiamdi, bing titia li riandi, sok Urana bixuandi. <sup>5</sup> Urana Xuanoa harua ba, “Aningonigo Urana ta maluxu makira, haxi sibuna makira, bo ba tawa Urana inia ing ganina.” Bola alaba haruanga olang? Tegu sibuna! <sup>6</sup> Ning Urana atin dimoti makira buk. Namua naga Xuanoa harua ba,

“Urana soxauti daxanga mana lipuadi diti ding,

ning atin dimoti mana lipuadi ditatua ding.”☆

<sup>7</sup> Binabu atatuang, awa hawa mana Urana. Asoxauti mang mana Satan, saing bagula yungang saing luki mala. <sup>8</sup> Ala haxek rangua Urana, baing bagula ma haxek ranguang. Ang lipu kubolu dianam mana, adamia rimaimdi\* bu walingaimdi disok sigixinga. Ang lipu hatuminga luwam mana, ayamu hatumingaim diandi bu hatumingaimdi disu maringina mana Urana. <sup>9</sup> Bing hatumingaimdi xadegiding saing atang haringina namua na alibu kubolu diana. Axugia masingaima mala hatumingaim xadegiding sibuna, axugia yahangaima mala ayangaim. <sup>10</sup> Atatuang Toxoratamona maxania, baing bagula itiang.

<sup>11</sup> Riagu hatuminga haringinam mana, labu ahara diana manggu tai. Lipu gaxarea daharua diana mana riading hatuminga haringinamdi kimbo disuxuyadi, bing bila daharua diana xaung disuxuya Urana hanaunaunganoa. Nabu usuxuya hanaunaungua, bing usu mana te. Tegu. Uitiung bila ung sibusung sanga ba usuxuya Urana hanaunaunganoa. <sup>12</sup> Ning hanau-naunga Moxonoa xaung Lipu Suxuyangam taininau ing ganina. Ing sibuna sanga ba xap muli

---

☆ **4:6** Runginga Xai (Sindaun) 3:34      \* **4:8** Mana Yuda hatumingadingdi haruanga ba adamia rimaimdi namuxina ba asauya kuboluim diandi, axugia hatumingaimdi saing asok sigixinga. Binabu, am gasigi bu walingam disok sigixinga mana maxixinga ba.

kimbo hanggalangia. Ne ung ba, ung gaxarea usuxuya riama? Tegu.

*Labu Ahatum Mana Buraginou Tai*

<sup>13</sup> Alungu to, angia teladi daharua ba, “Hatata kimbo buragina, bagula am gala long sabanga tela, am gawa niani tela, am gatuxu oxata sianggam, am gaxap siang xumana masok.”

<sup>14</sup> Laku, ang gaxabia ba baraxinta bagula sok buragina te. Baruta mana ang walingaima? Ang bila uxua, owa masok mongaitau saing hanggalang. <sup>15</sup> Binabu xai mana aharia bila li: “Nabu Toxoratamona muruna mana, bing am gawa saing am galibu alali kimbo alaba.” <sup>16</sup> Ning hatata ahasua xaung aitiang mana axadi aharia ba bagula alibudi. Kuboluadi na bila ba diang sibuna. <sup>17</sup> Binabu lipu gaxarea daxabia masup kubolu xai ba dilibu, ne dilibu te, bing dilibu kubolu diana.

## 5

*Haruangua Ila Rangua Lipu Xalaxalamdi*

<sup>1</sup> Ang lipu xalaxalam mana, alungu to! Mauxangang xangxana bagula daxapkang, binabu atang saing axaba. <sup>2</sup> Xalingimdi dibuya masup, saing binduxumdi digaxuti imangimdi. <sup>3</sup> Gol xaung silba angiadi dirosi masup. Baing rosianadi ba bagula disok bila yap bu tau sanggaimdi saing baxanga kuboluimdi sabasabia. Titi xaidabing subinganoa bo ba sokkuba, ne ahaxuru xalaxaladiyu. <sup>4</sup> Ahatumia lipuxim oxatamdi duwaxata'm umangaimdi! Agimdi maringin te, ahanai giminagiding

hataindi saing duwagiwagi na Urana bu haulidi. Ding wagingadingdi dila disok rangua Toxoratamona Haringing Sibunam saing lungudi ba. <sup>5</sup> Ang gawa xai sibuna titia li saing asu mana ang murungaima xaung kubolu sanggamdi. Bila buxudi sanggadingdi didudu, saing daxabia xaidabiding ungingama ma haxek te, bila balau awa xai, ahaxang ang murungaimdi, saing axabia te Urana bagula hanggalangiang. <sup>6</sup> Ang gata lipu maringindi haruandia bu aungdi mati, ding haringingading te ba dibiliang.

*Taragu Toxoratamona Mana Mauxangaradi*

<sup>7</sup> Binabu riagu hatuminga haringinam mana, aharingia hatumingaimdi saing aragu Toxoratamona ma to. Ahatumia lipu umangamdi. Ding diragu mua saing daharingia hatumingadingdi mana kuya xaung xaidaba tang duwaxata to. Baing angiatingdi dahaing dua xai. <sup>8</sup> Bila balau, ang xauna, ang gaharingia hatumingaimdi saing ali haringina. Namua na Toxoratamona xaidabing malingama ma haxek ba. <sup>9</sup> Riagu hatuminga haringinam mana, labu ang gahatianggu tai, nam Toxoratamona tang haruandia. Abagu! Lipu Suxuyangama li taxa xaluya ba, bo ba mauba.

<sup>10</sup> Riagu hatuminga haringinam mana, ahatumia Toxoratamona lipuxing suxunguxunguamdi dibaxanga mana yanoa. Ding daharingia hatumingadingdi bungina daxap salak sabanga. <sup>11</sup> Kira tahatum ba Urana guxam lipuadi dili haringina. Maxuna? Baing alungu Yop naxuyanganoa masup. Li haringina maluxu'm

mauxangandi, saing axabia masup kimuya Toxoratamona guxam. Toxoratamona baxagi mana kubolu gamogamu mosiam xaung kubolu usingangam.

<sup>12</sup> Riagu hatuminga haringinam mana, axamang sabanga bing labu aharingia haruangaimdiu tai, mana yayadi bila long xaiyua kimbo titia kimbo axamang telau tai. Tegu. Nabu aharia ba “Wane,” bing asu mana. Nabu aharia ba “Tegu,” bing asu mana. Nam Urana tang haruangia bu sina salaga nang.

*Lipu Maringindi Sabungadingdi Daharing*

<sup>13</sup> Nabu mauxanganoa xap angia tela, bing sabu. Nabu angia tela gamonoa yaha, bing waya olaidi bu iti Urana yanoa. <sup>14</sup> Nabu angia tela busi bing wagi mana sabunga yanamindi bu dima, saing mana Toxoratamona yanoa disabu mana, disabaxaya guxengia.\* <sup>15</sup> Nabu dahatum haringina bungina disabu, bing Toxoratamona bagula libu lipu busingamdi disok xai muli, saing itidi. Baing nabu lipu busingamdi dilibu kubolu diandi, bing Toxoratamona bagula yunga kuboludingdi. <sup>16</sup> Binabu atula kuboluim diandi mang, saing asabu mang bu asok xai muli. Sabungadi lipu maringindi disabu, ding haringingading saing aningoding.

<sup>17</sup> Elaitsa lipua na bila kira. Sabu haringina bu kuya ri te, baing mana niani tuwa xaung sobak tuwa tuwa kuya ri te.† <sup>18</sup> Kimuya sabu

\* **5:14** Lipu teladi kuboludinga bing disabaxayadi guxengia bungina disabu manadi bila kira Matodi tasuguadi langia.

† **5:17** Ubagu 1 Xaitamoxi (1 King) 17:1 xaung 18:41-46.

muli, baing kuya ri ma sabalunia, saing anginga dahaing muli umangia.

<sup>19</sup> Riagu hatuminga haringinam mana, nabu angia tela yunga haruanga maxunama, saing angia tela xap goxoya ma muli, <sup>20</sup> bing ahatumia alali: Lipu gaxarea duxugia lipu kubolu dianama goxoya ma muli sangua kubolung diandi, bing daxap muli sangua matiyua, saing dikaukau kubolung diang xumana.



**Urana Xuana**  
**The New Testament and portions of the Old**  
**Testament in the Mato Language of Papua New**  
**Guinea**  
**Nupela Testamen na sampela hap Oldpela Testamen**  
**long tokples Mato long Niugini**

copyright © 2018 Wycliffe Bible Translators, Inc.

Language: Mato

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-05-20

---

PDF generated using Haiola and XeLaTeX on 20 May 2023 from source files dated 20 May 2023

55f62369-23de-5cfa-956d-f88a05cead65